



Sesida dals

Communitgà ils

Protocol nr.

12 da december 2023

14 da december 2023

980/2023

Dumonda Mazzetta

concernent l'introducziun d'in «check climatic» sco criteri da decisiun

Resposta da la Regenza

Las dumondas drizzadas a la Regenza pon vegnir respundidas sco suonda:

Tar la dumonda 1: En il rom da la segunda etappa dal Plan d'acziun Green Deal per il Grischun (AGD) è vegnì elavurà il sboz per ina nova lescha ed èn vegnidas pre-visas midadas en trais auters relaschs existents. La consultaziun tar quest project, che ha lieu principalmain en l'emprim quartal 2024, cuntogna regulaziuns che realiseschan ina part da las disposiziuns da la Lescha federala davart las finamiras en la protecziun dal clima, davart l'innovaziun e davart il rinforzament da la segirezza energetica (LCI; Fegl uffizial federal 2022 2403 ss.). Quai pertutga per exempel la rolla exemplarica en l'art. 10 al. 1 ed al. 4 LCI. In'ulteriura examinaziun da relaschs chantunals areguard l'art. 12 LCI che n'è anc betg entrà en vigur, n'è dentant betg vegnida fatga en il rom da la segunda etappa dal AGD. Ina tala examinaziun avess prolungà il temp per elavurar il project. Perquai che las disposiziuns executivas dal Cussegl federal tar la LCI n'èn anc betg avant maun, èsi dal rest il mument anc in-tschert, en tge rom ch'ils relaschs numnads en l'art. 12 al. 1 LCI ston vegnir concepids, per ch'els gidian a cuntanscher las finamiras da la LCI. Scleriments en chausa pon per exempel vegnir fatgs en il rom da las revisiuns parzialas e totalas che vegnan a suandar.

Tar la dumonda 2: La Regenza na va betg d'accord cun questa valitaziun. Las prescripziuns da l'art. 12 al. 1 LCI concernent ils projects da leschas duain natiralmain vegnir realisadas. La Regenza parta dal fatg, ch'i na stoppia betg vegnir fatg obligatoricamain resp. en mintga cas in «check climatic» en il senn da la dumonda qua avant maun, en il qual las emissiuns presuntivas ston vegnir cumprovadas en CO_{2eq}. Las investiziuns statalas ed il pajament da daners da promoziun dovran en mintga cas in'examinaziun da la confurmitad cun il dretg vertent, al qual vegn ad appartegnair en il futur er l'art. 12 al. 1 LCI cun sias disposiziuns executivas. Perquai vegn

questa disposiziun gia resguardada cun controllar il conclus d'expensas correspondent. En l'ulteriura execuziun da las leschas che pertutgan ils secturs enumerads en l'art. 12 al. 1 LCI, ston vegnir resguardadas las prescripziuns correspondentas. Sch'in check climatic formal è necessari per quai, n'è anc betg enconuscent.

Tar la dumonda 3: Suenter che las disposiziuns executivas tar l'art. 12 al. 1 ed al. 2 LCI èn vegnidas relaschadas e suenter che la LCI è entrada en vigur, vegn la Regenza ad examinar l'ulteriur proceder. Per quest intent ston vegnir empruvà da cuntanscher in proceder armonisà uschè bain sco pussaivel tranter ils chantuns e cun la Confederaziun.

Tar la dumonda 4: La valitaziun da persistenza è in instrument facultativ che vegn applitgà per projects «gronds» cun consequenzas considerablas e che cumpiglia las trais dimensiuns economia, ecologia e societad. La decisiun, sch'i vegn fatg ina valitaziun da persistenza è chausa da l'autorità directiva. La dumonda davart il grad da l'applicaziun consequenta da la valitaziun da persistenza na pon ins betg responder mo uschia, perquai ch'ils criteris che pledan a favur d'ina realisaziun d'ina valitaziun da persistenza han tschertas insuffizienzas. Ins po dentant partir dal fatg, ch'in tschert potenzial per ulteriuras valitaziuns da persistenza exista.

La valitaziun da persistenza e la realisaziun da l'art. 12 LCI resp. in eventual «check climatic» na duain – tenor l'opiniun da la Regenza – betg vegnir cumbinadas ina cun l'autra, perquai ch'ellas han mintgamai in auter champ d'applicaziun.

Tar la dumonda 5: Per in'acquisiziun persistenta èn decisivs – ultra da la tscherna ed ultra da la paisa dals singuls criteris d'agjudicaziun – ils criteris da qualitad che ston vegnir ademplitds dals offerents sco er las specificaziuns tecnicas da la publicaziun, per exempel d'observar las resursas natiralas u da proteger l'ambient. Per l'agjudicaziun na vegnan quels betg validads. Las procentualas concernent ils differents criteris d'agjudicaziun èn pia mo limitadamain expressivas. Perquai duai vegnir desisti en quest lieu da far indicaziuns correspondentas.



En num da la Regenza

Il president:

Peter Peyer

Il chancelier:

Daniel Spadin